

四庫全書

集部

欽定四庫全書

集部

息園存稿詩卷

五至七

詳校官監察御史_臣龔驂文

中書_臣劉源溥覆勘

總校官知縣_臣楊懋珩

校對官修撰_臣吳錫齡

謄錄監生_臣宋德鴻

欽定四庫全書

息園存稿詩卷五

五言古詩

觀郡守胡公所開虎丘新蹟

胡公絕代才
宰物有精識
剖符鎮全吳
揮霍破餘力
公庭寂無事
惠化決疆域
虎丘古名阜
標榜厯千億
豈乏巖壑姿
往往厭偏仄
公來登層巔
四顧生壯色
海嶽氣

明 顧璘 撰

金匱要略卷五
蒼茫曠然吐胃臆剖垣發蒙蔽芟穢出嘉植洞庭七十
峯歷歷移坐側古人總含愧神鬼難秘嗇華構篋青巘
面勢各有得匪唯拓形勝實以表名德奇文挾精靈光
映斗南北古篆蛟龍蟠穹厓示深刻裁成演心神丕變
昭政式奕奕千載名永以重吾國

子魚南軒看菊

新霜下庭除寒氣薄叢菊幽花汎餘馨殘葉抱枝綠佳
人惜流序玩此竟昏旭開筵叙同心漏轉更秉燭飛觴

不停手既醉情益屬憶余別君堂三歲始再復前時笑
歌人今日半成哭君顏漸非朱我髮素將禿悠悠百年
期流轉亦何速功名有天造升高易顛覆不如邱園中
放浪展心曲月出但高歌無用太拘束

與王氏履約履吉文氏壽承休承袁氏補之永之
六賢上方山玩月

幽懷洽清夜興言陟穹窿寒景自慄慄况茲山間中明
月出海嶠浮雲淨遙空二八輪正滿桂影虛玲瓏河漢

近人瀉衣袂多烈風俯窺震澤外一氣涵鴻濛憑虛意
懽恍酒酣興彌雄浩歌楞伽巖嚮振馮夷宮山川閱今
昔代謝焉可窮今茲懽樂趣往者誰復同吳越且黃土
安問陶朱公不如林壑間偃仰息微躬神超形無闕道
合契有終彷彿絕塵境高舉凌烟虹

和何司空委心亭題壁四首

司空夙穎脫五車富詩書摛文南宮選老師謝弗如兵
曹執樞要策足躍天衢道腴篤真想聲利誠濶疎矩步

匪躋躅義路豈迴紆所志在忠亮而遑顧其餘以茲三十載中外恒迭居竭來謝帷幄南食建業魚君子重求已匪以外牽拘皎皎金玉心不殊在蓬廬

仕止辯時義豈徒決歸休措意非中和亦復乖天遊陽至百物熙商清火西流一為機心間徒愧海上鷗所以魯東門遲遲出尼丘陶公會末造矩矱難與儔山林豈不美堂陞貴獻酌仰懷海嶽恩吾力詎承不古人當齒齟齬遙情屬沉憂道有均休戚貞則宜黽求

高名耀寰宇白日行青冥大旱思為霖
睠焉繫羣情胡為念獨善渺渺懷南荆
安石昔巖栖幡然慰蒼生昭烈厘三顧
永懷遺孔明堯舜茲御天泰階既已平
海鵬負風力九萬將南征君子懽在朝
小人樂深耕後圖良未艾宿好詎可縈
豈不見伊叟匪忻竹帛名

蹇余抱孤劣戢羽還故山惕然覺昨非
奄及知命年為山念覆簣結網薄臨淵
先春曠麓蓂而敢効禳田司空憫弱質
引蓬置麻間獵道六籍內論世千古前
延頸矚

霄漢藐爾披雲烟出幽喜遷喬敢希泰華顛但恐筋血
枯夙夜多餘閑離羣復索處白首徒紛然

桂洲詩代夏公謹給事述

夏子情悠悠遮我賦桂洲桂洲亦有始請從先世起雙
溪何滔滔中洲坦如砥羣峯互環帶錯落奠屏几琵琶
特奇峭西迴蹠高趾其陰倚靈象儒先託仁里其陽抱
龍虎仙真夙攸止桂樹紛籠葱盤據固根柢華葉揚芳
馨林壑被餘美吾宗聚廬居瓜瓞既多祀滋洲昔知名

爰且因夏氏家運值陵歿洪濤忽淪汜皇曾僅一綫伶
仃迫宅徒延綿桑梓區顛倒鳩鵲壘孤墳沒寒莽吊望
增顛泚皇考役四方歸櫬獲所委桐櫨漸可材町疇日
荒圯賈宅空廢井孔壁漫殘史淒涼首邱念蹉跎歲華
靡顧攀桂樹榮沉憂卒難理儻云返柴荆永懷釣溪水
答談舜耕卧病池館見懷之作

朋游苦星散君今復多虞抱疴忽經年寄我空中書青
鳥翔雲間翩翩來舊都豈不限江海辛苦為誰踰書言

久契濶欲往阻舟輿芳尊湛桂醕美人安可俱明月遙
相望眷此兩踟躕君昔戰藝苑有才敵相如王門棄白
壁空谷生秋蕪唯餘東園石不廢高人娛幽懷日已遠
世網日已疎天運諒有復委心隨卷舒

別攝泉

今晨對君飲庭樹慘已黃燕齊十月交北風凜難當黃
金不須惜盛辦貂狐裝郵亭選健馬去路生輝光令子
鳳凰羽天衢定高翔蘭臺清華地氣骨自可量江南故

人少願君早還鄉共指紅藥叢花開日相望

與田司封雅論呈王考功

世路多曲徑人命有定錄野鳥亂雌雄塞馬分倚伏徒
馳烈士心詎厭小人腹顏顏感秋蒲逆境傷暮鵬采藥
懷名山棲衡念空谷曄曄紫芝餌飄飄綠荷服桃花夾
門生蘭葉依井覆焚香諷靈言酌醴延靜福遙迎老君
牛永辟留侯穀玄契屬君啟雅志匪予獨為訊王子喬
何年謝微祿

贈葉原靜遊鴈蕩歸金陵兼呈大司馬喬公

汎覽名山圖鴈蕩天下奇
天吳舉蓬島亂擲滄海湄
巖老蛟脊詰曲盤桃枝
攢峯蔽青冥星斗晝陸離
靈湫倒銀漢六月飛寒澌
仙人隱洞府玉簡靈文垂
白石充饌饘紫芝可療饑
鳳笙乍縹緲鶴駕時逶迤
綠髓苟未變丹梯詎能窺
葉子道者流夙稟烟霞姿
去冬游武夷未愜心所期
今春策短杖直往了無疑
天台逢李生拍手欣相持
溯流問桃水探穴尋仇池
俯瞰不測淵仰凌

萬仞危端坐天柱峯要觀日出時扶桑射東影瞥見蒼
龍髻太湖僅一勺匡廬忽平夷呼酒酌蒼梧鳳鳥來何
遲浩浩浙江濤伍胥今謂誰桃花落已盡芳草含碧滋
啼鶯勸客飲正與烟花宜滿舉白玉斗吞却東南陞坐
覺方寸間雲嶠相撐撐歸來回風亭目光如玻璃硯磊
作奇畫琳瑯吐新辭顛倒雷電走蒼茫神怪悲十日說
不輟齒頰生涼颼四座煩鬱散聽者俱忘疲靈秘自此
洩海若安能私還拜大司馬請陳賤子詩定知巔屹勢

縱橫列階墀迢遞金銀闕夢寐如見之謝客休挂席孫
公應解頤何必舉五嶽高下論等差至樂有同好難與
俗子知

贈別同年王大參唯忠

孝皇丙辰歲臨軒策賢良嘉運屬休暢羣才競騰驤搖
筆演明畧堦墀殷琳瑯天顏豁開納宰輔勤明揚最爾
泥塗身並遂雲霄翔服官列庶位展義各均當述作備
文物論思補遺忘彬彬慎六職肅肅司羣方小大雖異

適風烈互成章王度凜繩直而誰越官常公曹幸暇豫
朋從藹相將郊圻陽春候出入儼顒昂朱樓上客座賦
咏飛羽觴通家披露驪膠漆難比量綢繆誓靡隔沒齒
奉軒黃匪若蕭朱儔晚節竟參商中路厄陽九昏陰暗
巖廊明明聖哲姿垂拱示貞藏青霄走罔兩妖彗擾天
網誅求竭井里流竄連冠裳赤眉稱亂首萬姓疲捥攘
翠華無時出六軍行裹糧衆人貴附和直士死路傍吾
儕嬰禍網駢首投豺狼窮途莽星散音耗眇相望壯者

半投竄者宿多喪亡時觀禮闈籍涕淚空傍徨皇天眷
周厯中興啟宣王四凶潤齊斧元愷森朝行宿霧一朝
豁賜環皆老蒼春風洗顏色仍餘舊冰霜武林大藩岳
與君忝同堂生涯百憂後感激意彌長努力奮末路願
收桑榆光相期舉反側置彼席與牀提攜雙玉龍永夜
訝慨慷長嘯登吳山引首望八荒至哉虞舜德威鳳來
何鄉逢時樂無度陳義規太康清秋萬壽節獻表合四
方當君整冠佩告別兩倉皇始餞出國門再餞臨河隍

持袂累成泣沉痛咽中腸匪以私暱故重為同袍傷君
才久外屈清廟需珪璋我官已踰分敬闕思魚梁祇恐
遂乖隔薰身失蘭房所願崇一德安國繫苞桑仰譌天
保什用抵伐木章

周氏世壽堂詩

神堯御宇宙舉志法三王政始重養老下詔聞萬方崑
邱壽誼翁德儷四皓行年紀百十六眉鬢若秋霜召之
上殿見作步甚康強清問得孝理賜歸教其鄉郡有魏

太守治行尚循良老老率先訓賓主體相當降階奉几
杖親滌豆與觴臨郊再拜送觀者盡稱揚闔郡感滋化
斑白不自將老翁既仙去孫子皆淳龐明智誦詩書強
壯力耕桑三世並上壽為國增休祥四世產玄孫俊拔
如鳳凰三命作觀察肅肅振王綱信哉仁者後終然柱
巖廊鄉里表厥宅名曰世壽堂遐邇傳盛美作頌比絲
篁蹇予附末響樸拙匪成章太史倘有述終始差較詳

寄朱升之

少小負奇氣唾視豪俠流腰懸蒼龍劍未肯干王侯挾
策遊京師天子忽見收濩落風塵中傾蓋罕相逢君
東華省金蘭結綢繆陳義比臯契摛詞狎曹劉虛名附
驥尾隱然橫九州中路忽分散風波起離憂天南瘴癘
地鬢髮各已秋黃鵠畏彈射蒼鷹恥隨韝買田西郭門
將以備澹滄年饑水瀾漫鴻鴈不自謀鬱鬱斗金間撫
膺發長謳借問五湖水何處容吾鉤

送梁子材入京

蒼隼立臂韞側目望丹霄驊騮伏芻秣志在千里遙撫
軍磊落器英妙稱譽髦曠志局文史投筆誦龍韜舉意
萬人敵一劍恥所操扶策謁司馬氣吞四海豪對衆彎
彫弧百步猿先號名亞虎榜列價重龍門高還鄉拜慈
母走馬昇仙橋寶玦珊瑚鞭錦帶雙飄飄天子調薰絃
海晏無淫濤蠻夷一蟻虱邊鄙聞繹騷雄劍鳴夜匣怒
髮如揚翹報國指天日奮身豈蓬蒿翻然赴京闕六月
方炎煬揮汗宛成雨驅馳甚煩勞伐謀負多算賈勇挺

奇標南征慕馬援北游希班超崢嶸雲臺業慷慨誓所
遭烈士執高義顧盼輕兒曹

贈徐一之

質如荆山玉辯如巴江流清言析玄理晏坐消人憂挾
策獻南宮五上未見收精深田何易爛熳東南州今王
好儒學賢羅姿旁搜小者待金馬大者封公侯君行叩
閭闔吐論鏘琳球天顏一顧笑朝省皆回頭快哉風雲
會密爾膠漆投伊吕草澤人功成與天流古來盡如此

乖合非人謀

書張大夫事

張氏大王父高皇之故人執父從前驅趕趕稱虎臣請
老解冠劍歸耕長淮濱擊壤歌神堯何心瞻紫宸一朝
召上殿慰諭展情親手持黃紙符授爾職宣旬衡鄂大
岳牧藩翰廣敷仁淮陽勞長孺河內借寇恂殊恩報思
稱臣節實致身全歸保終始天造良無垠賢孫述茲事
奕世寵如新大哉神聖謨求賢本因民文武唯所用功

成任洪鈞請著大史策垂訓詔千春

密止堂貽王錦夫方伯

良賈貴深藏上德戒睢盱金人三緘口內葆恒有餘繁
君景前哲履道抱冥虛遠彼市朝喧閤然林中居叢木
既蔭蔚巖壑亦迴紆素琴不安絃對之萬慮除寄謝車
馬客毋來駭吾廬

贈丁溫州敬夫

秋草悽以黃鴻鴈銜哀思赭衣供井稅寂寞循良事穆

穆丁溫州愷悌自天懿製錦輸良材展驥控遙轡薤拔
少強宗風清無黠吏環海數縣侯奔走敷德施露冕循
郊圻戢戢馴野雉頗聞溝塍畔狼籍廣遺穗天南百萬
象庇覆罔不至輿人興長謠聊以存國志

息園存稿詩卷五

欽定四庫全書

息園存稿詩卷六

明 顧璘 撰

七言古詩

送按察周仲鳴赴雲南

東風滿目悲春草使君遠涉滇南道萬磧千山路眇綿
車煩馬頓人愁倒陰洞生穉白象牙古崖錯落檳榔花
西隅漠漠窺天際北極低低見月華烏蠻號令歸王制

繡服威儀尊漢吏共言俗遠要人和却嫌才大為身累
東門別酒玉盃深上客離歌拭淚唵翻然上馬揚鑣去
不似尋常兒女心

送陸良弼赴雲南

東吳陸氏古稱雄今日君家邁古風父子弟兄紆紫綬
麒麟偏在一門中與君作宦漢西京十載追遊暢性靈
飛觴謝傳圍棋墅彈劍周郎灑淚亭春來秋去懽無歇
星流雨散從今別君提戾印赴滇南浩蕩青冥動雙節

雄才健筆人不如况乃腹內多詩書
盛年黃霸初為郡紫閣歸來日有餘

答徐昌穀博士

前年共飲燕京酒高樓雪花三尺厚
酣歌徹夜驚四隣世事浮沉果何有
一為法吏少書米心結愁雲慘不開
昨傳學省移新籍坐嘯空齋日幾回

君莫悲歌慰許侍御喪子

玉顚雙角磽磽起圓碧凝光射眸子
驚刀鏤馬竹尾長

翩翩入花如鳳凰妖魘潛釀星垣厄愁雲壓空空夜白
仙媛飄裾挾玉童調龍御鶴三山東桂樹光銷蘭甲脆
繡襦襖袂濕秋淚飲君酒君莫悲人間百事會有時君
不見漢庭獄吏高朱門司徒何得無良孫

賦得落星穴送李師文字將樂

海風吹星落天地寒芒燭地光參差金精不向土中死
龜山劍水含靈姿世代悠悠挺人傑一卷遺書字難滅
神騎箕尾軼浮埃道煥奎文照餘雪李侯墨綬飛雙鳧

仙槎夜挽郎星孤餘杭舊患有殘碣莫惜弔古過平蕪
贈周子庚太僕行邊

寒沙射日明衣鐵蒼巘劈雲千丈裂關河南北氣全殊
八月陰山即飛雪丈夫勲名在遠道玉關銅柱非徒老
鵬搏九萬迴天風下視燕然一丸小

石峰歌贈陳侍郎玉疇

高哉烏石之青峰天梯挂地騰蛟龍星辰照耀翠光發
雲霧吐吞嵐氣重寒泉古木絕塵滓菖蒲芝草秋蒙茸

東南名山亦無數愛此奇峭多靈踪
紫微大夫有道者清標秀骨神所鍾
十年讀書住峰下攬結邱壑歸心胸
乘風一上赤霄迥步武稷契矜遭逢
蒼生洗濯足霖雨學士仰瞻稱岱宗
祇今台鼎逼掌握洪波砥柱殊從容
功成拂衣豈難事仙人有待巢雲松
武夷神君幔亭女金枝翠蓋期追從
須君峰頂荔枝熟來借江心桃竹筇

李大夫壽歌

李大夫真天人骨青髮黑善養真
昂藏野鶴七尺身中

隱磊落之經綸獻策早充觀國賓
豸冠直諫驚羣臣低回郡縣豈塌翼
霖雨一灑甦疲民石梁雪竇古名勝
東風坐玩桃花春珠璣往往落揮翰
五言破的如有神翻身岳牧已騰踏
轉盼台輔非逡巡大夫高義超風塵
長歌拂袖辭要津敬亭天柱吾故物
青霞倒映蓮花巾空厓燒藥紫金鼎
白日飲牛青澗濱千秋萬歲樂無極
人間富貴安足珍

夏山歌贈張常州大輪

夏山高山高入雲杳莫攀乃在東海之畔金華之間攢
峰抱壑飛瀑白古木礙日垂蘿斑張戾昔未遇結茆連
翠微冒蟠五千卷落筆蛟龍飛時隨牧羊子餐霞療朝
饑乘興歷參井誤觸織女機獻策明光直紫微專城畿
輔擁朱衣萬家凍餒今何有十郡諸侯似者稀公庭晝
閒無鳥雀燕寢香清拂羅幕夢魂千里長周旋一片青
蒼枕前落祇今當宁愛賢才君侯且勿思草萊待得功
成銘鼎鼎却逐山雲歸去來

劍池歌送李司法赴蘇州

千將乃是金天精
爪髮墮爐神劍成
龜文縵理踴高價
駿馬千匹三都城
盤魚騰光壯士死
闔閭耻作吳公子
鳬鴈長埋白虎峰
蛟龍竟化寒池水
池水泠泠百丈深
春花覆水紅香沉
池頭歌舞日懽賞
地下誰識君王心
君王已去河山改
千年符竹紛光彩
畫戟紅旌綺句飛
常布風流至今在
使君才俊傾梁園
登朝執法臨吳門
秦鏡光明照人膽
漢網踈闊流餘恩
青春多暇應出遊

劍池正對齊雲樓不厭橋東老居士時來散髮共扁舟
東原行贈金士希

蓬萊近在都城隈高原如掌風塵開長江疊送波濤色
鍾嶽橫分紫翠堆踈林曠望豁心目四時花艷紛相催
皇居咫尺接靈氣雲霞繚繞金銀臺橘洲桃水竟恍惚
終南太華空崔嵬先生泉石性所好紫綬裹體心潛哀
專城虎竹弃如土夢想此鄉歸去來掛冠散髮對高木
閒門白日生蒼苔手提長鏡刷春雨東陵瓜田身自裁

興起高歌拂衫袖虬髯仰將何毡毳江山開闢幾千古
孫郎突米生禍胎干戈六代闢白骨四十二帝翻雲雷
旌旗紫蓋轉滅沒瓊樓綺閣俱飛灰當時豈無攀龍附
鳳侶功成運去多嫌猜良弓已隨高鳥盡至今空泣英
雄才不如田盡成林當春潑作葡萄醅碑礫為甌玉
為杯買金便鑄十石壘上樂浸之可養性爛醉勿論西
日頽儻予出郭來相訪莫遣醒醒騎馬回

松谷歌贈戚侍御

金華之山峭而突巖壑空冥含大谷長松落落陰其中
連林直上蒼雲矗蒼雲拂天不可干白日漠漠生秋寒
棟梁森立鬼神守琥珀下閔蛟龍蟠誰其居者戚夫子
茅齋高樓青壁起雙溪泠泠三洞幽靈峰下瞰芙蓉水
閉戶著書三十餘翻然載筆登公車澄清天下獨攬轡
素心不營山中居青鞋草衣日在手富貴浮雲亦何有
致君堯舜却歸來谷口青松兩無負為憐向日牧羊徒
空然叱石何為乎

相逢行贈何司空子元

去年見君丹禁中今年逢君舊京道問君年米亦何事
笑而不答顏自好朝廷禮樂非等閑大臣執論安如山
師丹祇知正廟議朱雲非好犯龍顏龍顏轉變分怒喜
臣節堅貞等生死只今義烈貫雲霄大爵高官安用爾
蹇予結交三十年一見知君是謫仙文章落筆波濤用
風骨當朝玉雪妍司馬分曹力有餘兩河藩翰亦區區
天閑米牝三千頌栢府風霆萬里車台衡虛位需調燮

太史濡毫敘功業霖雨方諧天上歡浮雲忽作江南別
江南佳氣鬱龍從洛邑秦關未可蹤滾滾江流傳渡馬
蒼蒼山邑號蟠龍謝傳東山幾落花荆公精舍自啼鴉
由來勝槩歸高品再喜斯文得大家我家住在清溪曲
終日間持一竿竹不怕宮袍混草衣時來共咏春波綠

谿壑高閒歌贈史巽仲

句曲之東陽羨之西屯雲壘霧鬱為靈谿洞天三十六
杳莫窺端倪天皇秘金簡勅授仙人棲仙人舊居青瑣

密躡足星漢攀虹霓
冒填百萬經濟畧
沛作霖雨滋黔黎
鈞樞侯印立可握
忽然長嘯辭金閨
金閨雖云貴
榮華易銷落
何如中園移取蓬萊山
雕斲烟霞置樓閣
玉女成行備灑掃
靈君對坐燒丹藥
藥功深九轉成羽翰
身變八風生時朝天上
黃金闕那顧人間白玉京

異風行

季春之月日應柳野客維舟汶川口
此方赤旱罹百憂
復爾顛風示災咎
黑雲勃鬱西北生
輪囷直上掩太清

噓烟噫氣塤然至白日不得為光明沙飄石走檣柱折
雞犬竄匿皆狂鳴草茅半捲向空落大麥小麥揚枯莖
陰霾沉沉血色亦赫如伯益烈火焚榛荆萬竅雷呼動
天地又如真宰下與羣妖爭宋郊六鷁飛且退昆陽虎
豹各戰驚蓬窻孤坐不敢寐旅魂慘怛傷和平憶昔壬
申羣盜起梁宋災徵每如此十年白骨撐亂麻父老悲
號未云已祇今堯舜居明堂辟除凶慝登賢良璿璣方
調七政理此事乖刺誠何祥世無瞽史知天道獨立沉

吟向蒼昊

重別行送李川甫還汴南無訊李獻吉

長安道上春雪飛薄暮逢君疑是非
搖鞭駐馬一相問
雪花亂點白鷗衣
江海茫茫重相見
客舍張燈促青宴
愁無別淚墮金尊
漏轉寒更溢銀箭
君今三十方少年
秋雲刷羽搏雲天
簪裾色動麒麟殿
詞賦聲傾玳瑁筵
汴南作牧殊辛苦
抱哺黔黎一萬戶
近聞四岳舉循良
須知黃霸先台輔
樓船吹篴漢江流
乘月經過黃鶴樓

往時崔顥題詩處復見新句凌高秋嗟予垂老氣凋朽
天台崢嶸亦何有寂寞桃花何處吟縱橫豺虎空奔走
送君將歸舊思翻悵望南雲迴白首倘過夷門見李白
問渠詩興春多否

張司徒所畫山國圖歌

滇南一道盤雲上永昌巍巍更相望水流直下洱海深
陸地夫容矗相向小石紛磊磊大石高盤陀連空互撐
疊仰睇青差我攢峰挿牛斗飛澗懸天河崩崖傾斷下

無地但見猿猱掛骨號烟蘿丹砂空青的礫岩阿寶玉
夜炯靈光盪摩天門洞開紫宮逶迤玉女對侍星官駢
羅至高之極始見此遼絕下奈諸方何馬蹄絨鐵尚不
得度行人跛鼉馬能過我生水國多見水不圖山高乃
如此畫家山水貴相半吁嗟誰悉寰區理南園大老司
徒公維山降神為世雄晚張能事發新格盡吐硯礪之
心胃引鱣迅掃鳴長風顛林倒壑貌不同蒼雲黯慘喧
霹靂白日照耀開鴻濛蛟龍盤拏古木死螻蛄漂疾飛

梁通千巒萬嶂堆墨華忽然平曠披風沙飛榆開鑿雋
君國桃源點綴秦人家孤城四面削玄壁危樓仄立明
丹霞時清頗知官府靜化遠亦愛蠻夷嘉老翁戲獵逐
黃犬嬌女明粧簪素花形勝分明在指顧風俗想像增
咨嗟騰衝靡莫餘千里部落微茫分遠邇更揮淡墨灑
餘姿遂使天涯窮尺紙昨逢伯子示此圖瞠目驚歎從
前無乃知山嶽氣磅礴不用濫漫談江湖今之好山有
二老太原司馬吳門都見此寄書定相索公乎公乎須

寫數本萬里絡繹傳吾徒

昭君寫真圖引

漢宮九重類天居宮中美人粲璫琚姱容淑態意非一
網戶文窓煙霧虛就中絕代稱明君錦江波浪巫山雲
素月嫦娥獨光彩明星玉女徒繽紛君王行幸恣懽暱
蛾眉短長難具悉可憐睇盼隔重霄竟使畫圖欺白日
金珠不操靜女手丹青更甚讒夫口妍媸反覆在鎔銖
移愛為憎忍相負明珠萬里沉胡沙哀歌一曲留琵琶

今看青塚千年草豈是天桃三月花君不見無鹽入宮
粉黛羞齊宣美譽雄諸侯樊姬進女虞邱罷楚莊持麾
霸天下君王重色后隱賢吁嗟畫史欺嬋娟古來治亂
各有始為君三復關雎篇

陽羨山歌贈吳隱君

東臨具區水西見峨眉青誰將陽羨山倒景浮重溟此
山上應須女星雕琢雲霧開仙庭桃花洞戶列千室夫
容旌旗朝百靈神人種藥留巖崖化為苦草黃金芽水

品流傳逸士譜月團飛上天皇家山南今有樵漁客八
十鬚眉未全白日飲茶漿茹紫芝塵胎暗脫雙瞳碧鶴
鹿呼名任驅使龍鸞整駕當朝夕曾聞至人言此翁千
秋自會生毛翮我厭塵寰思玉舄名山相去況咫尺鼓
楫何時罨畫溪稱觴一訪烟霞宅

范氏娛永堂歌

草堂宛在淮之陽周除萬頃清湖光鳬鷺鸕鷀走階下
青蒲碧柳搖瀟湘傳家蠹蠹列圖史宴客稍稍鳴絲簧

堂中老翁八十強龐眉皓首神揚揚萬事唯知道古昔
一生不省干侯王河上仙公道書就漢陰丈人機事忘
翻匙紅稻美且足出水白魚鮮可嘗頗矜清世得笑傲
況有令子傳芬芳我知老翁應壽昌膝前簪組懼稱觴
雖無磻水非熊載且拜天門彩鳳章

午谷歌贈周別駕仲仁

終南之陰子午谷秦關襟帶紛迴復渭水斜連紫閣峰
石脚插入黃河腹雲霞勃鬱非人寰靈仙往往遊其間

青牛流沙去不返洞門白日苔花斑周子個儻士致身
青雲裏不肯忘巖栖呼此為宅里只今挿笏領蒼生片
言折獄稱神明台衡要路在轉盼丈夫大業終崢嶸種
松日長虬龍枝白髮還山應未遲江南杜老有高興待
爾相邀遊漢陂

五馬圖歌贈鄭紹興

畫圖五馬雲錦文誰其有者鄭使君房星降靈渥洼裂
龍種邁出駕駘羣金河蹴踏精爽振玉珂脫落權奇分

使君人異馬亦異氣槩萬里含風雲四明美政那可狀
閭井小兒知禮讓風化渾期太古前功名特出諸侯上
昨乘此馬朝王正錦韉光照長安城天閑駉駉盈萬匹
此馬一過人皆驚鄭君五馬真絕奇鹽車局促將何為
穆王正要追風足報爾王良伯樂知

砥柱歌上陳留劉相國

黃河之源出崑崙萬里震蕩排中原行雲翻空日月闔
急雨倒海雷霆喧下民咨嗟上帝怒乃遣神禹清乾坤

手握巨斧開龍門中標砥柱氣勢尊白波一道永深穩
青山兩岸無崩奔從此平成歌帝載休氣榮光應清代
效靈已見出圖書論功不用誇蒿岱柱乎柱乎安無頗
狂風惡浪柰爾何

五老圖歌壽祝封君

天地乃萬化之門陰陽乃五行之根太始逮今幾萬載
一氣不息綿綿存瞻彼五老靄若雲屯降神玄漠凝質
胚渾眉垂暮雪顏映朝暉玄冠朱紱素旌青幡履彼黃

道出入氤氲非五行之變化果孰得而究言靈風結駟
馬迅雷走駢車列缺叱右御須臾周太虛上帝洞天三
十六勅守互代羣仙居息駕廣漠野晞髮扶桑津西觀
蟠桃樹一花三千春曾同二龍父下應宣尼辰六經始
爛熳照耀垂生民不須神鼎煉大藥盡使壽域回清淳
祇今皇帝軒轅身山林父老華胥賓邇聞牛渚生至人
長生寶訣傳更真食霞服玉好顏色坐玩風揚東海塵

西江漁父歌

西江老漁父舉步隘九州遠尋鑪峰踞廬阜釣竿直拂
番湖流脩綸巨餌知幾許長鯨一掣皆吞舟楚人分膏
更飽肉魴鱖瑣屑休深愁興來杖策謁明主禮樂縱橫
邁三五拾遺補過列明光盡使蒼生獲安堵旬宣暫爾
下錢塘翻旆春風覆旆玉闕探禹穴上會稽望極海天
無盡處歸來向予言拍手笑無已君來海濱遊未知海
中事海上三山時動搖其下負戴六巨鰲我欲釣鰲置
山穩長風未至心徒勞君不見磻溪玉璫事幽眇太公

望子今將老又不見澤瀨羊裘傳者訛故人待我知如
何不然便可拂衣去莫負西江萬頃波

文仙石歌送田景瞻

高平仙人棲穩處長林疊嶂含風露仙人一去不復還
山中白石長如故蒼龍時上石牀眠老鶴猶窺丹竈烟
金枝翠蓋知何所洞門月色長娟娟南州太守有仙骨
分符亦得煙霞窟平郊微雨動朱輪多少高情坐超忽
春城春物好融神捫蘿曳履上嶙峋倘逢石髓歸來日

好憶東曹抱病人

松居歌贈金元美

帝城飛薨接清虛道人獨在松巖居
金花飄庭野風細翠葉拂檻涼陰踈
身披鹿裘皎如雪日把一卷神農書
斲苓採子煉大藥玉杵夜搗銀蟾蜍
偶然懸壺秣陵市手活小兒千萬餘
五大夫封等塵土十八公夢今何如
徂徠峯頭絕人路列仙同遊駕雲車

廣成仙人歌贈秦隱君

崆峒嵯峨入紫冥中有至人云廣成呼吁元化為氣母
偃仰天地同長生昔日軒皇御八荒謂言得仙貴可忘
萬乘親過巖穴下頻首不敢窺藜牀洪言如鐘剖玄旨
金液融光化塵滓白日騎龍登絳霄下視六宮如敝屣
海變陵遷春復秋瑤臺金闕漫悠悠云誰象外得真悟
東海隱君秦少游隱君顏色少如童八表冥冥睇遠鴻
桃花洞口人烟靜橘樹州邊歲事豐廣成仙今安在青
山拂石長相待何時招手一歸來鶴駕飄飄度雲海

遠招十五疊

按察陳君亮之沉命嶺南年纔不惑璘忝知心傷其
旅歿乃作遠招十五疊歌之靈筵幽明不遠庶見悃
悃云爾

歲云暮兮風蕭蕭索居遠想心無聊魂歸來江水迢撫
膺泣血歌遠招歌始倡兮天地愁英靈秀骨當王侯二
十操觚見天子三十馳名蓋九州四十金章方熠熠長
松忽萎天南頭著龜無靈相失驗古來賢遠為神仇魂

兮莫嗟當自尤

歌再疊兮憶疇昔川岳含精孕雙壁太邱之名風雅宗
元方季方俱籍籍盲颺震蕩滄溟翻棣萼凋傷鸛鷁隻
愁生閭里慘無光閉戶哀號失朝夕魂兮飄飄粵天碧
歌三疊兮思舊恩明公遇我如弟昆三年驅鷄走下邑
手挈駑劣還君門風塵折腰半失墜如我在枳何宜存
誓填溝壑無死所地軸倒陷摧崑崙仰天痛絕聲長吞
歌四疊兮憶將離孤舟理檝江之湄臨觴醉語共被宿

滿口王事捐中私壯年分携各慷慨詎意永隔存亡岐
魂兮遺我長相思

歌五疊兮去路長嶺南迢遞通炎荒窮崖少人嵐氣惡
草間跳蚋如龍驤不見漢時征戰苦極諫乃有淮南王
聖朝職貢化平上君胡為乎獨罹殃魂兮慎勿留其鄉
歌六疊兮歸路遠水懼波濤陸愁坂山魍魅闖崢嶸
林薄陰幽竄孤隄公有陰功載金錄煒煒神光燭諸燼
皇都旖旎飄雲霞寶幢玉節開行憶魂兮亟歸莫遲晚

歌七疊兮氣難平天心倒錯無權衡八荒納納恣羣動
祿壽乃與高才爭萬金瑤玖易缺折礦石匝地頑然生
布衣白髮騎款段何用鄉里稱賢明魂兮謬致生前名
歌八疊兮心欲絕野哭江頭淚雙血蘭枯蕙死薦筵空
哀草酸風燭明滅空冥精爽獨歸來凜冽平凝萬山雪
冰食水飲御清虛回厭南中獨炎熱魂兮歸來皎而澈
歌九疊兮君有家桂楫蘭櫓芳且華圖書充筵賓客美
豆籩圓方有核佳願君亟歸棲故處鬼神呵護無龍蛇

魂兮歸來樂無涯

歌十疊兮君有親胸蟠藻繡舍真淳七十狂歌顏美好
祿米頓減憂其貧願君亟歸在左右庇護杖履延長春
玉山有禾瑤水液何為默致資元神魂兮歸來孝且仁
十一疊兮君有兄儒林騰踏揚鴻名三千文學滿鄒魯
拱立階下觀儀型願君亟歸相出入纍纍百福資和平
魂兮歸來友愛成

十二疊兮悼君婦今年孀居去年娶迢迢萬里好將歸

故山年年哭君墓知君身後百不憂關里清風被裙布
魂兮歸來慰朝暮

十三疊兮悼君子
崧角熒熒尚兒齒
眉稜削玉骨插犀
一足龍駒躍秋水
冥漠知君愛不殊
祛除災難通文史
魂兮歸來歆世祀

十四疊兮傷同心
蚤年種樹晚思陰
誓輸筋力康濟畢
懸車息馬還中林
柴荆不遠數來往
兒孫更抱開長襟
虞淵白日忽捨去
使我無意於冠簪
魂兮託夢時相尋

十五疊兮歌已終
聲微淚盡心難窮
九原鍾逢不可作
高山流水悲枯桐
英雄去矣餘浩氣
萬古潺潺江漢東
魂兮為我流長風

掛劍圖

延陵公子有道者
義氣千秋動華夏
去時寶劍心許君
死後仍來懸墓下
白日青天一片心
豈因生死惜千金
寄言反覆輕薄子
三步腹痛休哀吟

秋浦歌贈觀察汪德聲

高堂誰張秋浦圖秋浦佳麗天下無長江西來一迴薄
齊山秀結真蓬壺千峰夾水通隱見峰削蓮花水明練
巨靈鬼斧力雕搜羽仙翠蓋長游行山山時見白猿行
樹樹倒挂朱花明疑從瀑布觀廬阜似拂霞標過赤城
敬亭銅陵相對起玄暉太白多稱美地靈必有傑人生
于今特出汪夫子汪夫子非等閒眉宇朗朗行玉山旁
冠中外二十載繡衣鐵斧誅讒姦天子書名御榻上轉
眼黃樞拜卿相勲業爭期郭令公田園晚憶陶元亮我

今歸去弄煙霞秋浦相望一水賒何日共君蒼玉峽提
携日月煉精華

息園存稿詩卷六

欽定四庫全書

息園存稿詩卷七

明 顧璘 撰

七言古詩

醉歌贈別劉希尹

江湖之情廊廟器歷城劉郎無乃是高雲塌翼墮泥塗
青衫采醉金陵市金陵市上少人知擊筑正遇高漸離
十年閉戶淮水畔雄劍繡澁長低眉喜君下馬握君手

但說家饒步兵酒眼前肝膽向誰傾身後功名果何有
龍蟠虎踞古名都走馬背槍多壯夫陳編爛簡不足數
英雄快意無時無新亭灑淚河山愁北山移文林澗羞
謝公坦蕩稱達者美人一去空江流君昔提衡當吏曹
龍門拔地吹波濤一朝謫宦歸江海雀羅挂戶生蓬蒿
此去朝元謁金殿世情冷暖應自見翻身臺閣雖等閑
著作林壑須輕健泰山巍巍五嶽尊上有日觀通天門
與君共坐東巖下靜玩桑田海水翻

贈劉欽執

劉君十五攻文章，宵次隱隱含星芒。
射策甲科屢推挫，上書太學空昂藏。
落魄塵埃少相識，日抱陰符事黃石。
嚴生賣卜不論錢，匡子傳經徒鑿壁。
生平顧我長開顏，相思來過天台山。
入門正值新酒熟，爛醉共話烟雲間。
夜長風狂銀燭冷，雪花灑面衣欄斑。
勸君且莫求神仙，武陵桃花迷歲年。
勸君且莫學劍術，五侯驕貴輕才賢。
詩書滿腹不餓死，古來豪傑盡如此。
君不見商王圖畫

求宰臣直是窮巖版築人

送陳子魚往霅溪訪劉南坦

故人歸耕霅溪上
白日閉門無客往
扁舟乘興吳門來
一片高情落烟漿
越王臺西春雨深
震澤波濤方泱泱
楊花幾時飛已空
碧草青蒲抱隄長
草堂相逢將奈何
但云酒熟來經過
傾壺一醉便歸去
莫問門前張雀羅
不見劉君幽恨積
憑君附書報東憶
人生強壯豈長得
何用驅車逐南北

周別駕宅看花

周侯方庭大如案四敘種花香不斷日高散衙一事無
手汲清池自澆灌鮮英的皪赤瑛珠密萼紛披紫絲幔
芳根異種多難識粉蝶黃蜂暗相喚西鄰迂叟饒閑情
叩戶時來索花看一來一醉酒千鍾月俸依稀費多半
君侯莫厭頻來過人生樂少憂患多與君聚散同落葉
不醉花前將奈何

平寧藩後上喬司馬

太行西橫天下脊降神昭代生喬公突如火嶽起中域
培塿瑣細安能同又如巨壑動千頃澄鑒品類含光融
今之留都古豐鎬九廟翼翼崇玄宮周南節鉞帝所授
文武韜畧雄江東羊祜綏懷亘千里蕭何填撫熙羣工
石城鍾阜倍生色龍虎吐氣長葱葱去年劉漢逞兇獍
烏合羣盜持刀弓出門北望色沮喪髑髏已屬提携中
亞夫高卧足不動兵符飛羽須臾通上游屹張犄角勢
諸道競奮勤王功舳艫百艘竟崩潰烈焰一舉鯨波紅

我皇英年孝且武金戈鉄甲臨元戎喬公泣血扣馬首
小醜詎足勞皇躬獻俘受馘大禮畢跪捧翠華廻六龍
三軍凱還伐金鼓聲動海宇連穹窿明堂奏頌朝貢入
解澤下沛蘇疲瘵勒功且立會稽石鑄鼎直盡荆山銅
雲臺功臣誰第一國論共聞歸發蹤侯王圭壁行照耀
山河帶礪何終窮璘也都門老賓客十年江海嗟飄蓬
喜聞鄉國再安堵遙逐父老歌清風但願天子壽考億
萬歲置公左右開宸聰芻蕘之言無少蒙永絕前日憂

金匱山房
卷七
忡忡

己巳十二月十四日夜雷

歲暮月望夜云午南山殷雷夾鳴雨蟄虫驚詫鷄走藏
青帝玄冥果誰主巫咸上天瞽史亡空臺無人識妖祥
披衣起坐殘燭下一夜不眠愁思長

寄高州太守陳洪載

雪霽寒鴈高登樓見明月故人在南海幽思坐飛越憶
南宮羅衆賓感君遇我最相親解鞅誤承王子重推金

偏念管生貧青春縱酒長干道白日行歌淮水濱高涼
迢遞別經年美政紛紛過客傳海畔明珠還夜浦花間
馴雉滿春田平生萬卷不虛用坐見古人歸席前男兒
立身貴磊落安得瑟縮推誰先為報田郎近為郡可無
書札問湘川

送陳漳州宗禹

九龍山前春草生麥苗覆隴雌雉鳴使君五馬齊雪色
錦韉左右垂朱纓玄髮清揚負才局兩都豪士傾心腹

山人聞君佩印來兩兩賣劍牽黃犢炎海風清不起波
滿城明月照絃歌想應露冕經行處把酒題詩奈樂何

送劉養和入臺

四月江南路積雨開新晴省郎躍驄馬健作青雲行看
君皎皎揚英姿迴山倒海自有時匣中龍劍皎如雪那
肯繡澁空藏為玳筵酒盡雙金樽仰天烈氣不可吞男
兒奮臂報知己豈顧一飯哀王孫

李少叅宅林良花鳥圖

寫生之家不易得崔白以後稱黃筌國朝林良亦神妙
意會物象皆天然何年畫此雙孔雀尾上金錢猶燦燦
疑從五嶺翻然來飛入君家翠綃幕衆鳥瑣屑未辨名
鳥驚燕雀各有情白晝如喧杜陵宅青春忽近長安城
攀條啄粒相頽頽時和自見萬物昌新蒲淺水雲淡淡
落花飛絮風茫茫高堂展圖感我私却憶先皇臨御時
朝廷無事友朋樂日聽春鳥吟芳辭一從羣盜亂中土
萬姓倉皇執金鼓東村西落少人家燕子那尋舊門戶

虬髯將軍才且武一洗羣盜無死所見盡還思熙皞時
題詩却訴流離苦春來百物倘如舊勸君有錢多釀酒

題柯行人所藏秋水織鱗圖

伊誰掇取瀟湘水鋪向長縑光瀰瀰碧牽文藻舞風柔
黃落衰荷抱霜死中添淡墨為羣魚魴鱖瑣屑各自殊
纖毫尾鬣空明見萬里江湖氣勢舒姑蘇野老困奔走
震澤扁舟落誰手展圖漠漠雲水生便欲垂釣掛魚口
君失此圖何許年完壁再返非徒然請君袖取入京國

天邊時一賞林泉

安平鎮

安平鎮前石岸高飛薨夾水壓巨鼇千門碧柳起春色
安居豈知排難勞昔日孝皇君萬方河水忽決黃陵岡
洪濤蕩汨失齊魯神禹不降蛟龍狂此地崩頽運道改
巨舸連翩落東海下民昏墊軫堯心朝廷經濟需元宰
司徒劉公社稷臣一心報國攄精神胼胝身任四載苦
版鍤淚墮千夫貧沉船墜埽黃泉下鐵石如山不論價

五丁叱咤驅風雷功成遂絕奔湍瀉宣防竹楫何足多
野哭一夜回謳歌司徒哀痛轉譙抑中官武將碑差我
碑差我廟赫奕廟中牲牢今絡繹嗚呼誰人獨慙色

送沐將軍兄弟歸滇二首

將軍白晢美青年滇南世世操兵權君王重是攀龍裔
推轂親呼玉案前搖旌擊鼓歸荒服駐鉞張油向宗國
五鼎陳牲入舊祠萬燭迎鸞出華屋城頭日出征馬鳴
五侯供帳花連營紫衣官妓呈瑤瑟錦帶家奴抱玉瓶

曲罷揚鞭凌遠道萬里長風動秋草
土吏椎牛勞後車
山岷驅象迎前纛諸蕃叩地當行軒
世世樂受君家恩
古來卻數稱儒將誰似風流在一門

樓船倚江揚大旗迴風簸日光離離
百夫轉舵櫓如翼
千里只作終朝期金吾將軍年絕少
牙弩射潮閒調笑
醜酒金陵王濬城焚香赤壁周瑜廟
愛君文雅真特奇
大兄金印鎮西夷府中寶券山河誓
閭外丹心草木知
君到滇南春物美鵲鵲飛處棠花紫
未開姜被說家園

先降韓壇問天子青萍切玉能成灰
奔塵絕電須龍媒
上將用才多為國它年看薦謝玄來

宗伯毛公宅畫菜

貴家金屏寫生者競取纖穠闢高下
獨憐意匠非世情
戲點嘉蔬氣蕭灑琅玕作葉瑀瑤根筆底畦徑移西園
菁華荏苒過雨濕紫翠歷亂凌風翻黃花丹縵各未吐
胡蝶蜜蜂俱已喧南宮宰相白玉堂掛之素壁生清涼
誰為灌溉劇抱甕我欲米擷盈傾筐豈無犀盤象筋大

官肉肥腴不快水雪腸對此薄飯每易飽踈簾歌枕青
春長蘼藍之味安能忘嗚呼蘼藍之味安能忘

碧雲寺

山中樓臺一何麗路人告是碧雲寺入門莫問造者誰
建寺以來初見此黃金為中門白玉為四牆檀心及桂
枝斲作棟與梁班倅督工墨顛倒窮肺腸但令偉麗後
莫比不用局束循王章主人退思坐中堂精神動天天
為忙山靈擘洞石開裂海若驅水龍彷徨眼中諸寺失

顏色可憐草木俱輝光吁嗟爾山何幸哉昔聞磽确彌
蒿萊牛眠應兆亦偶爾綺繡雜沓從天來爾不見列侯
金印何累累城踰百雉聖所裁又不見閭閻流冗多餓
死溝溪白骨無人埋攬衣上馬不忍顧臨風長嘆令心
哀

沈生來天台示予董子繁露

沈君布衣人藏書滿千卷開口談黃虞何心耻貧賤我
生與世多乖張交誼向君偏繾綣九月山城桂花白塵

飛郡齋無過客蹇驢箬帽雲中來忽若炎天墮松雪解
囊乍讀繁露書舉觴新薦望潮魚生逢奇事即快意何
必歌舞為歡娛我亦未得樂君亦不肯留仰視天台路
坐負桃源遊會須共釣石湖去莫遣歲月共悠悠

哭馬原思

斯人不可見荒臺空暮雲素琴漫發子牙指狂書豈及
羊欣裙騎鯨上天歸玉堂後米英俊日淒涼空餘故宅
高槐在清陰滿院斷人腸

寄題俞魯用分綠軒

江南五月百草長芭蕉遶簷十尺強
踈櫺曲檻靜相映坐覺幽綠生虛堂
波文隱約微風動紅塵不到蒼雲重
榴花照眼徒為繁葵枝孑孑將何用
太湖靈石高突兀此外唯須數竿竹
名園廣宅非君心一咏一觴殊脫俗
我欲入軒分半主獨恨終年走塵土
郡齋秉燭為君吟蕭蕭一夜聞秋雨

送京兆聞君移順天

巍巍京兆古所雄民之父母稱聞公昔傳趙張不易得
今見德政將無同去年饑饉多流亡溝壑白骨寒秋霜
今年甘雨起枯槁禾穗滿田如帚長南車北駕情悠悠
風吹甘棠馴雉愁冠帽河內竟難借汲黯淮陽誰見留
折楊枝挿江路楊枝他年作高樹萬歲千秋憶我公香
火常來乞晴雨

題王元章梅花和韻

墨池五夜飛玄霜素靈幻出梅花芳草堂忽爾見春色

金史卷之八
氣序不得由勾芒空山慘凜層崖裂千枝萬枝綴瓊雪
水晶屏風踈影寒舉頭却見黃昏月江笛橫飄黃鶴韻
還人莫報長沙信欲取寒芳寄遠書轉愁旅思催蓬鬢
簾外清香撲酒缸千金莫惜日飛觴解道明珠交玉體
風流獨羨陳思玉狐裘蒙茸不知冷醉卧花前不須醒
夢來直上羅浮巔占却梅林千萬頃

題唐子畏山水圖

赤城霞氣連東海九嶷綿綿舜陵在曾遊兩地縱奇觀

疊嶂填胸何礪硯
洞庭波濤拍雲天
吳江長橋絕可憐
扁舟夜携二三子
高歌月下招靈仙
歸來草堂老無力
山水迢遙苦難得
蘇臺居士好畫手
一幅畫寫蒼茫色
林壑高深氣杳冥
空潭颯颯水風生
開簾對此坐清晝
彷彿邀余萬里行

題王元章梅竹卷次祝鳴和

畫家妙品古亦稀
高人每號無聲詩
澹夫拈筆率信意
豈解盤薄凝深思
聊希形似即滿意
難與神化論等次

子喬老仙烟霞骨
剜出心肝洗塵俗
身化西湖一樹氷
氣吞湘岸千竿玉
映縑姿態聞纖穠
轉手枝柯分直曲
山空自喜野人同
歲寒敢謂吾曹獨
補之墨梅稱絕倫
與可寫竹恒逼真
今之畫圖無二妙
始信苦學能通神
草堂六月氣淒爽
彷彿坐我清江濱
白頭豈知老將至
對爾真足忘冬春
憶昨青陽迴綠草
橫斜桃李長安道
一夜飄風歷亂生
可憐花葉紛顛倒
塵世繁華有盛衰
朱門一閉無人掃
與君開卷玩高標
絕勝對客談虛藻

賦煮茶圖

朱門酒肉如山海沉湎徒云性靈改松闌冥坐真天人
朗如玉樹生華米澗阿霽雪新泉清風吹石鼎茶烟橫
悠然對語白日晚俯聽萬井蒼蠅聲

秦翁

江南賊米萬室驚太守倉卒呼鄉兵翁持黃金募壯士
長戈短劍如堅城猛勢憑陵賊遠徙衆欲論功報天子
老翁掉頭不相顧獨弄魚竿下烟水君不見古時魯仲

連一書飛矢聊城全功成卻賞蹈東海慷慨長為人所
憐翁今持此廉退節何慙青史共稱賢

鄒平王畫竹為羅子文賦

寫竹貴神不貴色畫師俗筆難為力古米能事自天成
蕭郎文老何由得國朝作者夏奉常祇今僅見鄒平王
金殿畫間一揮灑遂令縑素移瀟湘兗州太守得真跡
草堂白日寒雲積風葉當軒簌簌鳴霜柯倚座森森碧
清泉怪石映帶成即恐春筍驚雷生炎天對坐毛骨爽

便欲掉臂林中行
嗚呼絕藝不可遇
千金競買珊瑚樹
君不見寒士滿條
土木形遮道時逢
貴人怒

送劉方伯赴河南

梁宋繁華古無比
凋殘近自丙寅始
私門剖刻盡錙銖
羣盜誅屠及妻子
我分虎竹當亂離
膏盲之疾安可為
公為方岳會昌運
撥亂扶傷又一時
春風病草回青未
一望傷心墮清淚

同祝鳴和賦長歌贈方思道

詩人雅尚唯林麓脫畧功名輕汗竹有時大隱入金門
瞥視浮雲立幽獨棠陵山人少工詩風雲萬變含精思
東南名勝不可數悉化肺腑生神奇狂遊狹小四百寺
醉醒只在西湖裏瀾翻筆勢雄萬人觀者如墻盡稱美
昨宵醉後抱膝歌俛詞怪語何其多旌旗繽紛躍天馬
鐘鼓颯沓騰江鼉看君工詩已成癖把筆千言不須迫
耻裁舊體駕曹劉直舒豪氣吞元白橫絕四海如冥鴻
伯勞飛燕徒西東今年泰岳登日觀巨篇失却東蒙峰

歸來過杭留小草頓覺風花動流藻吾衰愧乏倚馬能
嘔血破研長枯槁

送潘方伯歸衛水

桂酒蘭舟湖水傍西湖六月似探蕩衆賓赤汗灑成雨
羨君道服南薰涼高歌返棹日將暮青山倒映浮雲黃
荷花絕勝美人面勸客留連各盡觴白壁青蠅豈堪數
富貴何如道傍土君不見二疏脫畧東門歸赫奕高名
照千古

紅拂圖

紅拂蕭稍紫麟尾夜半蒙羞見君子佳人絕代失相知
越國麗豪一何鄙天造草昧兮臣擇君幽憤結過兮女
求士卷衣杖策趨軍門末路英雄儻如此蘭心天嬌含
風雲莫歌行露嘲文君

賦芙蓉小畫送羅汝文赴鎮遠

錢塘十月交清霜落江水芙蓉蘸澄波顏色勝桃李可
憐桃李三月花紅雲碧霧競繁華亦知霜霰饒寒苦素

心所好何咨嗟君今五十已有餘南雋猶乘郡守車強
賦幽花贈君別臨觴三嘆意踟躕

送厯下陳生因東花泉子

齊城七十何彬彬國風闊達多才人田橫海島五百士
孟嘗門下三千賓當年義氣振四海至今作者猶殊倫
陳生遇我燕臺下鴻翔鳳舉驚青春迴鞭走馬復東去
落花飛絮悲行塵我欲因之向厯下華峰一訪平生親
笑騎天門雙紫麟周攬豪傑同逡巡上朝玉帝泰嶽頂

下見羣仙滄海濱丹砂入口生羽翼呼吸日月存元神
惜哉此志未易遂送君竚立空霑巾

京師三月謝張愈光惠料絲燈

客從滇南來京師遺我采燈光陸離伊誰鬼物歛作此
玉縷細滑明波璿媧皇煉石結靈液織女攜錦盤文絲
蒼龍拔髯老蛟泣畢獻技巧爭神奇空齋秉燭試張設
五色炫爛驚妖魑東方月出相映射還似鰲禁元宵時
便呼斗酒縱春興忘却江南歸已遲丁寧篋笥好珍襲

明年相對還相思

贈錢實夫

君不見蒼龍鬚風雷未遇藏深池又不見丹鳳毛失路
慘淡依蓬蒿乘雲忽起沛霖雨向日長鳴冲紫霄錢君
磊落方少年立地可以升青天高堂白髮須斗祿鬢宮
墨撒來翩翩世人相見莫漫憐寶劍腰下懸秋蓮丈夫
勲業在反掌應侯蔡澤非徒然

沈金吾東麓

鍾陵之山天下無東麓佳麗傾南都五雲宮闕抱龍虎
萬井煙花張畫圖金吾將軍連梓里甲第高起臨方壺
錦觴醉月調鸚鵡玉硯吟春教鳳鄉日領皇恩承雨露
時餘飛夢繞江湖

送南豐曹明府

曹侯若孤鳳不與羣雞同揮毫振風雅岸幘輕王公見
余燕京市把袂披心胃放歌登樓飲擊筑意氣雄新持
縣印南豐裏墨綬翩翩映秋水鸞刀瑩雪初發硎得君

亂絲為君理西江赤子惟罔羅頻年婦女持干戈願施
單父彈琴手聽取廉公五袴歌

贈謝少南

江左才華紛秩秩中間小謝最清出逢人咳唾吐雲霞
况復填胷富經術今年攀桂登南宮大鵬擊水乘天風
璫璣聲價吹噓裏鍾鼎功名指顧中東橋野叟病且老
每望長安絕西咲致君堯舜在英年殷勤送子龍江道
贈許仲貽春試

淮河冰壯不可涉徐方走馬蹄凍裂念子苦寒當北征
到京恰換陽春月南宮柳絲搖綠烟曲江杏花紅欲然
三三五五少年侶半醉題名鴈塔邊

雲泉歌

蒼厓積缺蒼雲鮮中有百丈之飛泉銀河西傾鵲橋斷
玉龍下掛天梯連仙人愛向山中住日玩雲泉不知去
清涼一濯毛骨寒紅塵飛來無著處

許彥明白蓮詩卷沈石田畫金赤松題

珍圖白蓮何皎然
盈纖風露臨秋鮮
丹青豈同俗匠伍
貞素獨與幽情便
瑤瑤滿池琢不碎
翠葉雨重欹仍顛
盛開欲落比雲散
乍踈復密如星聯
何不放筆鋪十頃
中間蕩漾吳姬船
嬌歌艷曲互酬荅
冰肌玉面矜嬋娟
風流領袖自石田
好事遺之歸攝泉
赤松郢倡復絕世
後來和者難為前
我欲西湖招勝侶
金樽美酒斗十千
林逋宅前放舟去
六橋曲曲相迴旋
古人今人盡如此
安得壽命金石堅
人間富貴草頭露
不須錦瑟調朱絃

金史卷之七
與君雪藕擘蓮子共唱新詩湖上眠

題楊司徒古松障子

昨從山中還草堂入門雲霧迷日光問之驚怪胡致此
司徒畫障懸東牆幾株古樹形突兀老龍怒立當我屋
泰山東巖五大夫參天氣勢無卷曲雪柯霜榦當夏清
耳邊謾謾風濤聲儼然邱壑在左右始信妙畫通神明
司徒應詔天上来捲簾清晝坐高齋不須把玩山林趣
正爾相資梁棟材

夜飲西麓道院得秋字

天壇露下叢梧秋故人置酒消我憂清歡不知白日晚
明月忽照城西樓道人橫笛試一叫寒龍水底聲啾啾
何不高張二十五瑤柱邀取湘妃弄月遊

題羅侍御所藏周必都古松障

昔年我登柱史堂古松畫障何昂藏
樛枝從容旁角勁霜皮錯落龍鱗蒼
不知墨幹凡幾尺氣勢直欲凌雲長
移牀盤桓坐其下六月不熱迴清涼
畢宏韋偃骨已朽

乃有周老傳芬芳祇疑畫手太奇崛人間無此真棟梁
昨經南湘湘水曲夾道萬株俱突兀根老居人忘歲年
陰深過客逃炎燠郡齋正當蒼翠中三歲捲簾看不足
鸛鷖秋栖不敢定猿猱夜度愁還哭有時枕書相對眠
宛在君家畫圖宿君今作牧向東魯泰山大夫更奇古
我詩恐未盡君意請君自作喬松譜

息園存稿詩卷七

欽定四庫全書

集部

息園存稿詩卷

八至
十一

詳校官監察御史臣龔勝文

中書臣劉源溥覆勘

總校官知縣臣楊懋珩

校對官典簿臣汪日贊

謄錄監生臣張紹鼎

欽定四庫全書

息園存稿詩卷八

明 顧璘 撰

五言律詩

山中晚興二首

古原浮夕照，灌木轉晴風。
人影梅苔上，鷄聲竹樹中。
炊烟通壑瞑，積黍驗年豐。
長吏無苛政，農家樂事同。

野曠少人煙，雲霞起暮天。
飲牛臨古澗，射雉出平田。
林

屋松然火山礪穀箕錢班荆有遺老高論上皇前

秋居雜詩六首

披襟臨莽蒼覽物玩芳華庭宇清風滿琴尊逸興賒梁
空歸社燕林煖綴秋花却歎居年久西飛白日斜

翠篠縈三徑金飈肅九秋蛩聲依廢井鴈序落平洲竹
靄寒浮水嵐光曉近樓蹇予幽興遠踪跡轉淹留

自謂浮生晚何嗟未路新驅車登古道歛衽向時人夢
覺求衣早愁深攬鏡頻永言周道盛誰見泣祥麟

冉冉舊林泉，風光滿四筵。
鳥啼連樹響，魚戲點波圓。
方域文明晝，郊圻大有年。
聊歌擊壤曲，共和慶雲篇。
病却林塘爽，園扉盡日封。
寒聲連蟋蟀，秋色罷芙蓉。
土木形偏野，雲霞思頗濃。
茅齋殊不惡，窗戶引羣峰。

落景掩衡門，虛簷蚊虻亂。
喧天空涼露，早月淡小星。
繁簾晃蘭膏，燭庭薰桂醕。
尊悠然歌古調，何厭處山樊。

送高介夫入京

歲令初迴斗河流，已過冰風煙春岼。
草兒女夜船燈驛。

金少曰八
卷八
路緣雲上離心對月增憑君語朋舊多病苦騫騰

送鄭信卿春試

元正初吉日遊子北征時馬色經山疾鶯聲過水遲忍
能江上別如與杏花期何處袍堪染南宮柳萬絲

秋興和金大仁甫二首

物候催巢燕秋聲報野蟬樹深全隱屋池小恰迴船白
鳥梳晴羽丹榆綴古錢故園棲適樂留語記茲年

葵老初辭蝶槐疎不翳蟬卧涼收簟竹飲減怯觥船自

蠟登山屐長賒對菊錢浮生最難得丘壑度豐年

客舍聞李侍御師文至未獲晤對悵然有懷

乘驄來日下聚梗及春邊擬得論心喜猶遲見面緣
魂懸此夕容鬢憶當年追遡嚴城隔燈花望不圓

鳧塘

瀟瀟平塘水寒鳧靜自羣日斜雙影下沙遠數聲聞
米飄香雪夫容護錦雲主人機事息長對閱朝暉

經鍾山

鹿飲紅泉細猿啼翠壁重仙雲凝舜塚王氣拂秦松地
接金椎道山藏玉檢封鼎湖長在望何處仰宸容

送趙生

白馬飾朱幘迴鞭駐華門國風吳李札家世趙平原聞
飲投壺捷停歌說劍喧歸途多綠草默默望王孫

吊程公子

書劍早從軍南征誓策勲弓刀爭白日圖畫失青雲地
迴魂長往天高語不聞英雄長扼腕揮淚灑孤墳

送陳斷事

宦轍紅塵畔時名白髮前
星移驃騎幕江動孝廉船
祖席橙分蟹離亭樹罷蟬
秋風將別思天外兩淒然

觀音閣望江

塵服乍辭鞍花臺共倚闌
林端憑樹短閣上見江寬
地拔千尋險山藏四月寒
東流為誰逝終日浩漫漫

卜居

為愛紅塵遠何嗟白屋貧
琴書唯舊物花竹有新隣
偃

仰堪吾寄蕭條免盜嘆携壺顏巷口半是問奇人

秋葵小畫

慘淡生綃色秋花擢露森黃勻塗粉額赤抱向陽心節
序誰云暮風霜爾獨禁草堂披拂處默坐寄情深

贈李副使獻吉江西視學

輜軒分羽節高義豈為榮南省文儒化中朝國士名嵩
雲無雨動楚月出江明莫道風塵暗君行自有情

贈侯員外入秦冊封

皇澤開新國文星出上都
河流經雨漲山館帶雲孤
下榻淹高駕開襟接壯圖
炎天正煩鬱何幸對冰壺

寄潘侍御宗節

兵甲縱橫地音書久不來
豺狼當道吼鴻雁向人哀
奔走成何事沉淪惜異才
團山南望迥千里漫黃埃

祭敬甫墓下淒然作

故國秋風至高墳宿草生
獨脩蘋藻薦何限死生情
水淨孤潭影風流宰樹聲
重臨石苔路空憶舊經行

八月十三夜與文濟時範質甫城西泛舟達秦淮
三首

落日清川裏，輕風已自涼。
秋懷生白舫，山翠撲胡床。
問路疑天上，停杯待月光。
何人橫鐵笛，吹過斗牛傍。

六代烟華地，狂歌得夜遊。
山河橫王氣，水月弄清秋。
木落長干寺，雲殘太白樓。
共君須痛飲，沉醉傍滄洲。
浩蕩平橋飲，留連落月西。
衣冠洛陽社，風物武陵溪。
遠泛移龍窟，高吟振鳥棲。
不知今夜景，能使幾人迷。

贈張徵伯

求昏江南未遂詩以贈還

俊逸張平子才名動地傳
文章侵大雅騰踏正華年
未射金屏雀仍還雪夜船
離尊不相送愁夢隔江烟

吳都臺東湖書屋八首

夢想嘉魚裹東湖有釣磯
遙聞精舍勝似向故園歸
禮樂攤黃卷亭臺坐翠微
曾經遊息地草木自光輝

水滙蒼梧郭天開綠野堂
雲山秋滴翠水井夏生涼
藥滿尋山徑花垂點易牀
少須康濟罷散髮任徜徉

滿目潯灘水涵虛淨客心塵埃飛不到絃誦有餘音坐
傍梅根瘦行臨竹塢深湖頭鳬鴨隊來往自浮沉

拂座松枝古填門石壁青聊垂馬融帳獨坐子雲亭問
字諸方集談經弟子聽人傳南斗畔光彩應文星

五嶺精靈聚當朝更曲江大名千古敵直節萬夫降化
俗身為度擣文筆似扛如聞鄒魯教今日在南邦

曲曲開幽徑迢迢接故邱蒼雲深洞壑白露滿梧楸
老詩篇廢蘋香祀事修慈烏千萬箇啼斷北林秋

山林元自僻，栖息易為安。
鄴架書千卷，嚴灘釣一竿。
枕榔披露重，薜荔掛雲寒。
門外無車馬，時時岸鷗冠。
市遠寂無譁，身閒樂更賒。
靜中全道氣，物外送年華。
避暑探孤洞，尋春聚百花。
高歌紫芝曲，餘響落青霞。

崔司成後渠精舍八首

汨汨寒渠水，迢迢落太行。
震雷崩斷石，懸溜別清漳。
灌注注分林，麓棲遲得草堂。
頗傳崔子玉，新有浣花莊。

清渠橫舍後，碧色動城隅。
寒掠垂簷幕，光搖挿架書。
斜

風飄白鳥落日倚紅蕖渺渺江湖興投竿豈羨魚

司城捐佩日歸去濯清流雲水傳青眼鷄豚共白頭雨
添雙棹興花動四隣游欲看西山色林間更起樓

幽棲臨水瀨野興洽春郊帖石成魚笥分泥上燕巢琴
尊宜暇日農圃得新交已識玄仍白無勞客獻嘲

聞道銅臺下鷓鴣舊有陂新渠自誰鑿春水亦連漪枕
席心愈靜園林物自私相望淇澳近移種竹千枝

開園非洛下抱膝且隆中出處關吾道文章有至公祇

今瞻獄立誰與嘆途窮一息圖南翮仍搏九萬風
學士還書屋銀魚向壁懸王通才不小劉向論何偏抱
甕開蔬園披裘弄釣船那知升斗水中隱蟄龍眠
小築家林接幽尋野興通雨麻翻徑綠風東墮堦紅地
僻衣冠懶心閒著述工渠頭秋水至東望意無窮

贈何司空子元

白日難迴照丹心盡此生司空官豈左集議禮多名國
是歸牽引皇衷自聖明玉階霑泣日真見老臣情

贈徐堂

小阮龍駒子長途拂劍歸毘陵三尺雪寒滿黑貂衣骨
肉行踪散風塵客鬢稀平原招不起豪士竟誰依

哭李師文憲副二首

激烈先朝疏沈淪積歲年初聞登憲府倏爾掩黃泉伯
道終無子馮唐豈乏賢彼蒼猶忌刻那望世人憐
誰奪千金璧俄崩萬丈松羈魂逢鵬鳥直氣化蛟龍吏
道循良傳人倫孝友容長號呼不起淚滿若堂封

哭景伯時中允

中允璠璣器臨年失廟廊江山空爾秀科第竟誰光志
屈經綸略名蜚翰墨塲石渠劉向隕徒使漢庭傷

寄顏唯喬

顓頊淮陽別歸田近若何應知閉戶後祇是註書多龍
去逃江海鴻飛挂罔羅雪深僵卧夜縣令莫相過

贈別劉元瑞還寄茗溪四首

出處意誰測去家今幾年病辭烏府節歸泛太湖船琴

鶴居何定尊鱸味獨偏長歌自南下不問買山錢

仗鉞臨雄鎮輸忠翊大廷紫霄搏鸚隼白日走雷霆即
擬參元化何因賦獨醒風塵聞望眼歷歷太行青

不築江東宅仍尋苔上廬乾坤俱傳舍邱壑且樵漁托
跡龐公隱陶情逸少書終泥紫金鼎安坐講玄虛

郊居塵事息嗒爾寄禪房菜甲供晨夕松林傍雪霜客
來幽興起官罷病身強頗笑陶彭澤醺醺混道場

寺宿再別元瑞四首

寺閣懸燈宿幽期記昔年風煙幾分手湖海各迴船疏
廣辭官切稽康習性偏相逢多貰酒囊罄莫論錢

余病隱吳市君歸辭漢廷鶴棲宜獨樹龍卧惡驚霆江
月維舟久風泉喚酒醒南山多舊意相贈十松青

世業劉公幹仙才漢子房翻身下霄漢礪齒漱冰霜閑
戶詩書遠還山步履強時應振餘韻爛熳壓詞場

赫赫中丞貴歸與一草廬委心同野馬垂釣即溪漁節
映冰壺立名遭汗竹書平生行已意披豁對青虛

東園分韻

竹塢紅亭隱松巖碧磴懸雲光浮蟻爵秋律應鵑絃綏
坐延明月高吟對暮天不因開洞府何以狎羣仙

雨再遊

細雨秋塵淨林亭異昔觀清遊吾屢得密坐客齊歡草
樹春無淨池塘暮轉寒殷勤巖桂色已謝兩迴看

飲振之館限韻

高館臨槐栢清筵引桂觴淮南秋望迴江左故懽長氣

色瓊枝映詞華翰墨香只應今夕會星聚比陳鄉

寄吳縣楊尹

滿目循良事賢侯即古人彈琴變民俗飛鳥雜風塵棠
樹千家頌桃花百歲春枳棲難久滯天上待持鈞

寄沐叅將崧

異姓王孫貴偏裨將帥雄威行蠻部落名竝古元戎緩
帶辭兵印長歌綴國風不須傷意以天聽自多聰

嘉鄭老至

鄭老交親久新詩近見多好奇遊泰嶽為客傍黃河故
里餘松菊幽尋更薜蘿養病茆屋下愛爾此經過

寄水南田勤甫

耿耿綈袍贈頻經灑淚深相看萬里別獨抱古人心岐
路俄星散高才竟陸沉辭官真得計怡老乏黃金

宴守溪相國園亭二首

黃閣辭榮早丹邱托興遙蓉池窺海島芝館踏烟霄卧
處蒼生望憂餘素髮飄當筵心盡醉秋爽詎能銷

窈窕平泉宅清華獨樂園烟霞深晚景花竹靄春溫招
隱臨叢桂懷仙倚洞門自慙塵土質聊爾奉琴尊

遊虎邱二首

畫舫踈簾雨溪門落木秋黃花仍對酒白髮兩登樓古
井泉香發荒池劍氣浮驅馳吾已懶誰共老茲邱
故園初入望嘉客且同盟倚檻觀秋稼吟詩對晚晴浦
寒鴻雁起天暝水雲橫急管休催發悲歌正有情

贈子魚

與子三年別重來鬢已蒼
論心風雨夕下榻水雲鄉
畫閣燈花煖秋杯竹葉涼
忽忽行止意相對兩彷徨

贈吳醫

更入壺中市新林種杏多
閉門看古典汲井起沉痾
愛酒狂方朔能醫老華陀
茂陵方病渴愛爾數經過

將往吳下成少子婚羅質
甫徐一之俞魯用泛舟
送至令橋二首

千古秦淮水離觴我輩來
山河形勝出舟楫畫圖開秋

色丹楓映羈懷片雨催吟詩別親友重發謝公哀
婚嫁人間累猶然及老夫未成遊五嶽先遣入三吳戀
別停孤棹劉惔倒白壺摩挲葛仙鼎相向嘆迷途

十三夜質甫諸君別去乘月行舟

霜月明如畫沙溪見底清客疑燈下坐舟向鏡中行讀
易無昏字看山辨遠名祇應歸棹上翻遣別懷生

漂水道中值雨

旅次番番雨山行活活泥長途添馬病午飯迫鷄棲作

客懽應少勞生晚尚迷誤辭賢宰約忍聽僕夫啼

野店

急雨官塘道篝燈野店門茅茨連霧靄車馬帶泥痕男
子四方志王孫一飯恩年來乍安穩無乃咤心魂

遊光祿史弢仲宅溪山不值光祿

咫尺十峰聚周廻一水通壺懸蓬閣界槎犯斗牛宮野
竹排雲碧溪花傍雪紅無勞見安道幽興自難窮

夜度九里湖

烟波東郡濶此水亦無垠風起搖坤軸雲生抱月輪
葭秋後思江海病中身夜舫迷茫去逢誰可問津

暮雨登上方山

暮踏孤峰雨蒼茫下界分平湖鋪大野高閣掛行雲
霜氣明楓葉天寒叫鴈羣擬投僧舍宿清梵夜堪聞

陸子潛子遠携酒過宿贈一首

二陸吾邦秀携壺問草亭醇醪雨中醉寒燭夜深青
寶氣騰雙壁人倫瞻六經坐餘玄論洽傾耳為君聽

壽太守姚大章

耆舊襄陽滿耽吟復此翁名躋作者列身有古人風避
寵辭朱紱含精守絳宮誰云眉覆雪轉覺面如童

除夕和邊太常庭實

守歲椒盤宴懽然傍老親誦詩從稚子分肉遍隣人菽
水慙三釜執荆寄一身青燈能送喜金藥夜開頻

正旦

乾坤仍獻歲車騎正歸休禮樂今王作門庭舊客留老

餘耽酒癖貧有買書謀所願皇輿正吾生豈浪愁

宿宜興東坡祠下

先生聊一念遺廟竟千年不返遼東鶴長悲陽羨田月
高羣木影人語一溪烟世事皆春夢吾今且醉眠

瓜洲江眺二首

把酒臨江閣洪波滿目來却看浮玉樹青壁轉崔巍水
鳥孤飛下風帆萬葉開古人輸郭老賦味盡雄才

日嶠攢紅樹雲湍擁碧沙春生江有色地盡水無涯虛

閣歸晴望深杯領物華亂山西去好隔岸認吾家

望焦山莫至

石闕東溟起雲含北固青江山分氣槩風雨走精靈處
士輒龍詔仙巖秘鶴銘由來玄圃路少許俗人經

飲仲氏山池二首

鳳葉搖新竹虬枝結古松宛臨三畝宅翻上九華峰池
淨深深見花繁處處逢愛君多美酒留賞興從容

池月啣樓影巖雲沁酒香扣門無俗駕開宴有韶光暗

水鳴軒砌幽花近石床淮南招隱地叢桂更芬芳

舟次對月二首

穆穆春宵月泫泫春水流直窺千尺下寒影動瓊樓烟
草迷晴渚風花入夜舟關山吹玉笛遺韻渺生愁

孤舟明月好春思結川雲岸煖桃花近洲香杜若芬良
辰空作客薄宦未離羣不分清輝隔鈎簾過夜分

舟膠

川涸唯泥滓舟膠不可過安山一步地千里渺銀河雨

澤經春斷風霾徹夜多欲尋滄水使長揖請餘波

暮春四首

旅次移春色沙暄碧草深遊絲橫渡水飛絮巧穿林物
態催年序風光攪客心不禁蒼鬢短衰白忍為侵
故國春殘日暄風綻牡丹詩成傳綺席人醉倚朱闌久
種能多夢無言獨耐看十年虛此會何用繫微官
煖覺春衣重閒知晝漏長蛙聲今日有花片晚來狂懶
性憎書札衰顏信藥方絕交非達論那敢學稽康

齊魯春全旱焦原麥不肥
幸逢天子聖端怪雨師非世
難占農務吾生指釣磯
懸鶉行滿眼空著大夫衣

谷邊太常華泉二首

遠別書盈篋相逢淚滿襟
年均誰黑髮交久各傾心
竝棹清川永開樽短漏沉
與君論舊跡轉覺愛光陰
坐挹松筠氣追憐玉雪姿
先朝名獨盛直道宦猶遲
骨肉交情老風波世路危
蒼生方切望天意更誰疑

贈唐員外雲卿二首

特達青雲器蹉跎白首郎行藏身自得今古意何長秋
日饒詩卷江天一草堂空憐賈太傅流涕弔沉湘
京口通鄉井台南接宦遊誼先傾蓋密詩及倒囊收黑
綬真微物清談足勝流新裁芟衣就應許竝漁舟

夏日桐巖道中二首

野日正矜午嶺雲難自涼祇愁山石裂漸覺黍苗黃物
役煎衰鬢吾生習瘴鄉眼中多茂樹安得置菰牀
居人猶灑汗行子獨何堪鳥翼垂難戢龍鱗渴未安只

疑臨火井誰暇乞冰盤稍待涼秋至蕭蕭見爾殘

飲定公竹院分韻

片雨飄庭竹微涼泛坐隅不須十畝盛且喜一塵無避
俗逃金界忘情倒玉壺眼中清供滿餘賞及盆蒲

舟次呈林郡牧楊司理二首

昔結蕭朱綬今登李郭舟秋隨人共爽晚覺意俱投古
樹分隄綠迴川抱市流踈簾同慰藉無酒亦銷憂

十日仙舟竝三秋逸興多天空披積霧河潤飽餘波星

斗連檣宿風烟舞劍歌百年饒意緒傾倒柰君何

經賊處復聞警

舉目堪流涕蕭條戰伐塵野花搖白屋江燕啄青蘋將
帥恩私厚朝廷法令新連城憂盜賊嗟爾異方人

蔡林屋舉酒愛日亭玩月

露下碧天涼空庭明月光幽人愛叢桂舉酒近池塘河
影填烏鵲簫聲下鳳凰莫教秋興淺不盡夜歌長

同諸君遊碧峰寺

淨域秋如昔佳賓勝在茲壺觴牽野興歌咏發巖姿殿
古高雲積林深落照遲莫留殘醉去他日思睽離

宿達公房

舊地人重宿勞生夢一醒亂峰明積雪虛殿納疎星僧
髮老逾白佛燈寒更青悠然生道念對坐閱金經

送同年王奉常赴闕四首

鵬運方南海鶯遷更上林禮容恢國步人望簡天心朱
紱羣公列彤墀委佩音台衡應不遠四海望商霖

王氏名流衆韋家相業優滿牀亂簪笏奪目見琳瑯一
卧留丹壑崇班尚黑頭鼎彝千古業晚節會須收

虎榜論交後差池有歲年相逢俱暮矣懷抱各依然余
釣東南水君還尺五天離愁將去棹冉冉隔江烟

觀風來幾日覽勝有餘情漢闕留關右周王重鎬京乾
坤纏水府龍虎抱山城紙價休驚重班生兩賦成

張叅戎園十首

時物易代謝名園偏較遲松杉無改色花卉遞生姿托

興雙樽酒澄心一鏡池請看新種竹取次發孫枝

鬱鬱吳山色居然隱几看巖巒排闥至風雨捲簾寒盡
日開圖畫伊誰振羽翰差差龍鳳嶺飛舞繞朱欄

兀坐華軒下相邀待月生未看離大海先喜照前楹庾
老情非淺陳王賦欲成繞池多少樹蕭索送秋聲

遲日散花影離離幽意新美人嬌寫照狂客醉留春醒
酒宜眠石窠芳莫動塵年米空色相已悟淨為真

東風吹玉蘂晴雪謾離披石逕寒香積蒼苔晚色宜多

情沾短屐故作泛殘卮無限相思恨君聽橫笛詞

一春長病酒小啜向寒塘掬得梅花影添留齒頰香填
胃無俗物吐論發餘芳悟取清冷味何須列鼎嘗

月痕如半壁下印碧池深光動虛無境寒龍不敢吟空
林垂露采清夜淨人心坐盡西巖影悠然萬籟沉

石洞夜何扁雲歸宿杳冥海天藏蜃氣山雨帶龍腥大
隱聊同憇高飛本自靈翻然看出軸萬里震風霆

怪石崢嶸立雄姿對吐吞平泉三品貴泰嶽丈人尊摠

謂雲根秀誰當砥柱存定教狂老米袍笏拜轅門
將軍池下水洗硯變成玄地覺風流勝人疑造化偏龍
蟠雲共黑鵝戲雪矜妍報爾山陰縣王家舊事傳

送紫光祿入賀嘉禮二首

十年天祿閣白首老楊雄直諫名猶懃新詩語太工遙
瞻温室樹緩步禁墀風應傍爐烟裏還過青瑣東
禮正羣心協恩覃萬國歡月輪重合璧雲鑑更翔鸞露
草沾行珮風花撲去鞍新箋文爾雅傳書九重看

永寧寺春遊和殷文濟二首

勝侶皆靈運名僧有道林
行歌穿竹逕醉舞占花陰
寺好偏宜古山幽不厭深
春城無限酒愛向野間斟

有懷思痛飲無病愛春遊
地主全雙美禪心破百憂
鳥啼連樹響花落照溪流
莫怪城闌隔山中醉可留

宿祝釐寺值雨

名山堪避俗好雨更宜人
塵淨竹林翠堂虛金氣新
焚香殘夜火薦粥煮秋尊
轉覺空門趨能令客意親

答攝泉見壽

跡忝緋衣後心踈白髮前
常時來古寺獨坐聽鳴泉
露榭臨花飲星牀傍鶴眠
有書渾懶讀將欲廢丹鉛

內官墳祠

寂寞近臣祠天恩不在滋
塚寒長作燐樹靈半流脂
未覩銘功鼎空傳護勅碑
遭逢固應有王制恐非宜

秋日與諸文士息園宴集各賦一首

上客東吳彥芳樽脩竹林
飛觴催染翰列炬耀華簪
蕉

葉暮陰合薇花秋序深清言藹羣玉雅義重無金

孟中丞後園

客有丹霞想官居洞壑隨松雲霑散帙竹月照銜庖吏
隱誰無遂風流衆所推時邀二三子高咏習家池

張郎中宅晚集同孟中丞

曲榭臨秋水芳筵及暮鐘稽康真野鶴郭泰摠人龍賦
接風襟爽杯浮露醕濃霜威方豫悅玉漏合從容

秋日郊游同劉希尹祭陳中丞墓

翠壁含纖雨丹榆醉晚秋幽尋今雅社勝槩舊皇州時
序登臨興江山浩蕩愁侯巴情不極腸斷子雲丘

同劉子登雨花臺

登臺秋色遠對酒暮雲生海氣浮金闕人烟接錦城佇
談王霸跡轉見古今情江水東流急滔滔無盡聲

送盛箴

博學蘇明允多才盛孝章計偕隨漢薦賓發自周鄉雄
劍照秋水青袍含御香遺珠君莫嘆天子重明揚

朱氏園對月

清秋多逸興月出更相宜
城郭滄洲迴園林白露滋
竹深邀送酒魚躍喜鳴絲
忍向寒光底徒歸不詠詩

送袁經歷歸信陽

舊業申臺下歸心汝水東
人皆千厚祿君獨有高風
學圃家園側逃禪野寺中
青天雲霧豁流目送冥鴻

呂太史仲木舍對菊三首

客心驚日月對爾惜年芳
取醉開金盞流馨滿玉堂
不

辭霜霰苦聊伴鬢毛蒼寂寂青宵半含情傍燭光
幽貞移楚澤搖落對吳天采采三秋後依依獨客邊深
杯搖素月孤燭耿寒烟一別陶彭澤何人更爾憐
飄蓬俱異域聚面復都城幽興闕時物衰年戀友生黃
花堪一醉白髮苦多情坐久渾忘去鄰雞且莫鳴

許彥明過息園同作

永日青林靜來過賦采薇琴尊留晚興泉石借清輝翠
篠經年密丹榴過夏稀秋風知尚早梁燕遽先歸

保叔寺

閣飲雲相對鐘鳴客倒聽林風無夏爽山靄過湖青濟
勝身俱健逃禪意已冥詩成多秀句轉益道心靈

和劉光祿觀潮

把酒驚潮至鳴絲且罷彈錢王莫漫射枚客正須觀濤
捲日爭白鯤騰天讓寬當筵疑濺雪醉舞不知寒

九月八日飲振衣亭歸有懷三首

亭余作也

勝地湖山槩浮生嘯詠情崖傾松徑仄亭遠石門橫
暇

日衣堪振秋天酒共清城昏合歸去林月向誰明

落日山亭飲含情遲月華高秋何負我遠客正思家桓
老開萸酒陶公把菊花匏尊空野興菽水自天涯

主客臨高賞江湖近座流長筵欺短日濁酒傲清秋亭
榭開新跡風烟愜壯游不知千載上誰醉此山頭

贈樞使李竹坡四首

台郡論交日青雲屬望勞韜鈴顧榮扇契合呂虔刀王
事輸肝膽軍容肅羽旌每從公退處杯酒接風騷

徽垣叅下列樞府喜同升跡忝雙龍起才看一鶚騰諸
侯趨紫綬直道引朱繩獨立將軍樹謙光衆口稱
憶逐樓船後朝天上赤墀衣冠同拜舞殿陛借光儀擊
楫春江穩投壺夜漏遲往來行樂意披豁慰支離
垂老東藩長官聯復對君交親方有數勲業更超羣氣
壓麒麟閣春生虎豹軍吾方棲退舍端坐羨風雲

息園存稿詩卷八